

TIMOTEOTA SAN PABLO MUSUGLLA KARTA KACHASKAMANDA

¹ Jesucristo kachamuskami nuka kani, Alli Willaita willaspa puringapa. Taita Dius nukanchita kispichig i nukanchi suianakuska Jesucristomi chasa niwarka. ² Kam Timoteotami kai karta kachaiki. Kam, Jesucristowa suma iuiarigmandami nuka kikinpa wambrasina kapuangi. Taita Dius i nukanchipa Iaia Jesucristo, kamta kuiaspa, llakispa, suma iuiawaiwa kawapuachu.

*Llullachispa iachachigkunata piñai
iukaskamanda*

³ Nuka Masedonia alpama llugsingapa kaspa, kamta Efeso puiblupi kangapami mañarkaiki. Chasa kunaurapas chillapita kapuangi; chasaka, mana allilla iachachigkunata kam upallachingapa. ⁴ Ianga parlukunata mana puchukangasina ñugpamandakunapa wambrakunapa wambrakunamanda sugkuna willanakuskata mana uianakuchu. Chi parlukunawaka ianga rimanakuimi tia. Chikunawaka mana alli kankunachu, Taita Dius ima niskata rurangapa. Paiwa suma iuiarispami chasa ruranchi.

⁵ Chasapaka iachachingi, tukuipi suma allilla mana jiru iuiaspalla, Cristowa sutipa suma iuiarispalla tukui parijuma kuianakuchu. ⁶ Sugkunaka, chasa kuianakungapa sakispa, ianga

piñachirinakuspallami kaugsanakú. ⁷ Paikuna, sutipa chasa kagta nispa rimaskata mana iachaspapas, munanakumi, Moisés ima rurangapa niskata iachachig taitakuna tukungapa.

⁸ Kasami iachanchi: Moisés niskata imasa allilla ruraspa kaug sangapa iachachigpika, sumami ka. ⁹ Kasapasmí iachanchi: Moisés niska, allilla kaug sanakuskata uiuachingapa mana kanchu. Subirbiaspa mana uiagkunamandami ka. Chasallata, mana Taita Diusta manchagkunamanda i tukuipi mana allilla ruragkunamanda, Taita Diusta mana munagkunamanda i paita kamirigkunamanda, taitata i mamata wañuchigkunamanda, pitapas wañuchingapa munagkunamanda, ¹⁰ kari warmiwa pandarigkunamanda, karipura warmiwasinga pandarigkunamanda, runakunata randispa katugkunamanda, llullagkunamanda, llullaspa juragkunamanda i Jesucristomanda allilla iachachiskata tukui sug rigcha sug rigcha nispa wabutigkunamandapasmi ka. ¹¹ Chi allilla iachachii, tukuipi alli Taita Diuspa askurinti suma Alli Willaitami willaraiá. Chi Alli Willaitami mingawaska ka, nuka willaspa puringapa.

Taita Dius, San Pablomanda llakirispa, suma kawaskamanda

¹² Nukanchipa Iaia Jesucristomi iapa animu karawarka. Pai ima niskata nuka rurangapa kagta iachaspami pai kikin agllawarka, pai ima niskata rurag kangapa. Chimandami nuka paita: “Pai Siñur” nini. ¹³ Ñugpata karkanimi paimanda mana allilla rimaspa kamidur. Chasallata, pawa tukuskakunata puchukangapa kalpachidurmi

karkani. Paiwa manara iuiarispa, paita mana allilla iachaspami chasa rurakurkani. Chimandami Taita Dius nukamanda llakiripuarka. ¹⁴ Nispa nukanchipa atun Taita Dius, iapa sumami kawawarka. Chasallata, Jesucristowa karamuwarka, paiwa iuiarispa, sumaglla kuiaspa kaugsgangapa.

¹⁵ Jesucristo, kai alpamami samurka, pandarri iukagkunata kispichingapa. Chasa rimaika, tukuipi sutipami ka. ¡Amalai tukuikuna, chasa iuiiantrangichi! Tukuikunamanda mas pandarri iukagmi nuka kani. ¹⁶ Nuka chasa kagpipas, Jesucristo ñugpa nukawa kawachirka, pai tukui pasinsiawa kagta. Chimandami Taita Dius nukamanda llakiripuarka. Chasapika, nuka tukugsamurkanimi, sugkunata kawachigsina pai iapa pasinasiadu kagta; chasaka paikunapas, Jesucristowa suma iuiarispa, mana puchukaridiru kaugsaia chaskingapa. ¹⁷ Suglla Taita Dius, imaurapas iaia mandagmi ka. Paimi mana kawarig i mana wañug ka. Pai nukanchimanda iapa llakirispa suma kawaskamanda, paita nisunchi: “Kam, iapa suma allilla atunmi kangi, maituku waranga waranga watakuna ialigpipas”. Chasa kachu.

¹⁸ Timoteo, nukapa wambrasina kagmanda, imasami Santu Ispirituwa rimagkuna ñugpata kammandu willarkakuna: chasallatami kamta mingakuiki, alli suldadusina Diuspa Rimaimanda makanakugsina kangapa. ¹⁹ Chasaka, Cristowa suma iuiarispa, tukui allilla iuiaiwa imasa chaiaskasina ruraspami kaugskankangi. Ikuti sugkunaka, kikinpa alli iuiaita mana uiaspa, pandarispa, Cristowa iuiariskakunatami wabutirkakuna. ²⁰ Imeneo i Alejandromi chasapi kan-

kuna. Paikunataka iaia kukutami kararkani, Taita Diusta mana kamingapa iachaikuchukuna nispa.

2

Imasa Taita Diusta mañai iukaskamanda

¹ Tukuimanda ñugpa, kasa iachachingapami mañaiki: tukuikunamanda Taita Diusta mañaspa i ruaspa, “Pai Sifur” nispa kangichi.

² Atun mandagkunamanda i tukui paikunawa kagkunamandapasmi mañai iukangichi; chasaka nukanchi, Taita Diusta iuiarispa, tukuipi alli iuiai iukaspa, sumaglla allilla kaugsanakungapa.

³ Chasa mañagpikunaka, allillami ka. Taita Dius nukanchita kispichidurtami suma kuntintachisunchi. ⁴ Paika munanmi, tukuikuna kispichiska kangapa. Paimanda sutipa Alli Willaita iachachukunami muná.

⁵ Suglla Taita Diusmi tia. Suglla runami tia, Taita Diuswa i runakunawa pasinsiachig. Chi runa kanmi Jesucristo. ⁶ Pai kikinmi sakirirka, tukuikunamanda wañuchii tukungapa; chasaka, nukanchita kispichingapa. Imasami Taita Dius, chi punchapa niska karka: chasami tukugsamurka. ⁷ Chimandami nukapas Jesucristo agllaska kachamuska kani; chasaka, Alli Willaita willaspa puringapa. Chasa nukata chaiawaku, mana judíu kagkunatapas chi sutipa Alli Willaita allilla iachachingapa, paikunapas Cristowa uiaringapa. Nuka, mana llullaspallami sutipa kaskata niiki.

⁸ Chasamandami munani: karikuna, maipi kaskapipas, Taita Diusta suma iuiarispa mañaspa

kangichi, awasinama maki churaspa. Tukuipi alli iuiaiwa mañaspa kangichi, mana piñachirinakuspalla, mana ainirinakuspalla.

⁹ Chasallatami munani: warmikunapas, mana iapa awapi i mana achka kulkawa randiska katan-gakuna churarichukuna. Umamanda agchakuna-tapas mana iapa sumaiachichukuna. “Sumaia-sami” iuiarispa, iapa bali katangakuna, kurita pir-lakunata ruraska u imakunapas mana churarispakaugsachukuna. ¹⁰ Chasapaka, imasami Taita Diusta iuiarispa warmikuna iukankuna kaug-sanga: chasallata tukuipi allilla ruraspa kaug-nakuchu.

¹¹ Warmikuna, tukui ima iachachikuskata upalla uiaspa iachaikuchukuna. ¹² Warmikunata mana sakinichu, karikunata iachachispa, mandag kangapa. Paikuna iukankunami, ima iachachikuskata upalla uianakunga. ¹³ Adantami Taita Dius ñugpa wiñachirka; nispaka Evata. ¹⁴ Chasa-llata, Adán mana ñugpa llullachii tukurkachu. Warmimi ñugpa llullachii tukurka. Chimandami pandarig tukugsamurka. ¹⁵ Chasa tukugsamuspa-pas, warmikunaka alli mama kaspami kispiringa-pa kankuna, tukuikunawa allilla iuiaiwa kaspa, Cristowa suma iuiarispa, tukuikunata kuiaspa i Taita Diusmandalla kaugsaspa.

3

Cristowa tukuskakunapura iachachig taitakuna, imasa kaugsai iukaskakunamanda

¹ Kasa sutipami niiki: maikanpas Cristowa tukuskakunapura iachachig taita kangapa munag, allilla rurangapami munaku. ² Chimandami iachachig taitata chaiá, ñi imapipas mana piñai tukungasina kangapa. Sug warmillawa kaug-sachu. Mana iapa urdimal kachu. Tukuiwa allilla iuiaiwa, sumaglla kuiai tukug, wasima pipas chaiagriskata: “Iaikui” nidur kachu. Allilla iachachingapa pudi kachu. ³ Mana kachu machan-gichu, piwapas piñachirinakug, kulkimandalla iuiaspa kaugsag. Piliaringataka, pasinsialla iuiai-wa kachu. ⁴ Kikinpa wasipipas sumaglla kaugsan-gapa iachachichu, paipa wambrakuna sumaglla kuiaspa uia kangapakuna. ⁵ Maikanpas kikinpa wasipi kaugsanakuskata sumaglla kaugsanakun-gapa mana iachachii pudigpika, ¿imasatak Taita Diuswa tukuskakunata pudí, sumaglla kawaspa iachachingapa? ⁶ Cristowa iuiaringapa musug-lla kallarikugsina mana kachu. Paiwa musuglla iuiarig kagpika, pudinmi atun kagta iuiaringa. Chiwanka, imasami iaia kuku, urmaspa, justisiai tukurka: chasallatami justisiai tukunga. ⁷ Cristo-wa manara iuiarigkunapas paimanda: “Allillami kaugsá” iuiarispa kawanakuchu. Mana chasa kagpika, pudinmi chi iaia kukupa tugllapisina ur-maspa, tukui wagllinga.

Cristowa tukuskakunata aidagkuna, imasa kaugsai iukaskakunamanda

⁸ Cristowa tukuskakunata aidagkunatapas chasallatami chaiá, ñi imapipas mana piñai tukungasina kangapa; chasaka, suma iuiaiwa kawachukuna. Paikuna rimaska mana ianga

kachukuna; mana machangichu kachukuna; chasallata, imasapipas kulki mirachingapa iuiailawa mana kachukuna. ⁹ Cristomanda iuiariska mana pipas ñugpata iachaskata charirichukuna, tukuipi allilla iuiaiwa tukuspa. ¹⁰ Kasapas. Paikunata chaiakumi, ñugpa kawaspa, imasa kagtakuna iachangapa. Nispaka, tukuipi alli kagta kawarigpikunaka, pudingakunami, Cristowa tukuskakunata aidag kangapa.

¹¹ Warmikunatapas chasallatami chaiá, ñi imapipas mana piñai tukungasina kangapa; chasaka, suma iuiaiwa kawachukuna. Mana kachukuna wasa rimagkuna i iapa urdimalkuna. Suma rurakunata mana kungarichukuna.

¹² Cristowa tukuskakunata aidag runakunaka, sug warmillawa kaugsaspa, paikunapa wambra-kunata i wasipi kaugsagkunata sumaglla kaug-sangapa iachachichukuna. ¹³ Chi aidagkunataka, allilla ruraskamanda, suma iuiiwami kawan-gakuna. Chasaka paikuna, Jesucristowa suma iuiariskamanda mana manchaspallami willanga-kuna.

*Nukanchi Cristomanda iuiariska iachaika,
askurinti sumami ka*

¹⁴ Kambagma utkalla chaiagringapa iuiakuspapas, kai kartatami kachaiki. ¹⁵ Chiwanka, nuka unaiagpika, kam iachankangimi, Diuspa wasimandapura imasa kaugsanakugta. Diuspa wasimandakunaka niraianmi Taita Dius imaurapas kaugsagwa tukuskakuna. Imasami wasita pilar-kunawa rumikunawa sinchi charí: chasallatami Cristowa tukuskakuna, sutipa Alli Willaita charig

kankuna. ¹⁶ Sutipami kasa niiki: nukanchi Cristo-manda uiariska mana pipas iachaskata iachaika, askurinti sumami ka. Kunaura, kasami iachanchi:
 Cristoka, runa tukuspami kawarigsamurka.
 Santu Ispiritumi kawachirka,
 kaugsaipi wañuipipas, pai ñi ima mana pandarig kagta.
 Anjilkunatami pai kawarirka.
 Mana judiu kagkunatapasmu
 paimanda willai uiarigrirka.
 Kai tukui alpapimi
 chi paimanda Alli Willaita
 uiuarisingapa tukugsamurka.
 Paika, sug luarmami apai tukurka,
 suma punchapi kagringapa.

4

Cristowa uiuariskata sakikunamanda

¹ Santu Ispíritu, allita willaspa, kasami ni: “Tukurii punchakuna ña chaimukuura, sug-kunaka, Cristowa uiariikunata sakispas, llullachig kuku wairakunawa iachachigkunatami uiangapa kankuna. ² Chi iachachigkunaka, miski simimi iukangapa kankuna. Tukuipi llullaspami kangapa kankuna. Jiru ruraskamandami paikunapa alli uiwaita wañuchii tukuskasina kangapa kankuna. ³ Chi llullaspam iachachigkunami ningakuna mana kasarangapa; maikan mikuita mikungapa, sug mikuikunataka sakingapa”. Chi mikuikunataka, Taita Diusmi ruraska ka; chasaka, paimanda sutipa Alli Willaita uiuarispa kagkuna, paita: “Pai Siñur” nispa, mikuspa kachukuna. ⁴ Taita Dius

ima ruraskaka, tukui allillami ka. Chimanda, ñi imatapas mana wabutii chaianchu. Sumaglla “Pai Siñur” nispami mikudiru ka. ⁵ Diuspa Rima-manda i paita: “Pai Siñur” niskakunamandapas-mi chi mikuikuna mana mapa kagsina niraiag-samú.

Jesucristopa alli lutrinsinamanda

⁶ Nuka ima nikuskata Jesucristowa tukuskunata kam iachachigpika, paipa alli lutrinsinami kankangi. Chi Alli Willaikunata nuka iachachiskata kam uiaspa katichikugpika, alli mikui mikukugsinami kankangi. ⁷ Kasapasmí niiki: kai alpamandalla ianga parlukunatapas mana uia-kungi. Chasapaka, Taita Diusta iuiarispalla kangi. ⁸ Pugllaikuna iachaikuika, mailla allimi ka. Ikuti Taita Diusta iuiariika, tukuimanda mas allimi ka. Kaipi kaugsaimanda i sug luarmandapasmi alli ka. ⁹ Chasa rimaika, tukuipi sutipami ka. ¡Amalai tukuikuna, chasa iuiantrangichi! ¹⁰ Chimandami nukanchi, sinchi trabaju pasaspa ruranchi. Mas iapa llakiikuna pasanakuspapas, Taita Dius imaurapas kaugsagta suma suiaspami chasa mana sakirinchi. Paika, tukuikunata kispichigmi ka. Paiwa suma iuiarigkunatami mas kispichingapa muná.

¹¹ Nuka ima nikuskata rurangapami iukangi suma iuiachispa iachachinga. ¹² Mana pipas kamta wasa churachukuna, “Musumi kangí” nispa. Chasapaka, iukangimi tukuipi alli kanga: rimaskapi, suma kaugsaskapi, kuiaskapi i iuiaskapi, tukui jiru iuiaikunata sakispa; chasaka, Cristowa suma iuiarigkunata imasa kaugsanakungapa chaiagta kawachingapa.

¹³ Nuka manara chaiagrinkama, Diuspa Rimai iskribiraiaskata uiachispa, suma iuiachispa, allilla iachachispa kangi. ¹⁴ Cristowa tukuskapura iacha taitakuna, Santu Ispirituwa rimaspa, kamta maki churaura, Taita Dius karaska; chitapas mana kungarispalla iuiakungi.

¹⁵ Tukui chikunata rurangapaka, tukuipi suma iuiarispa kangi. Chasaka, tukuikunami kawangakuna, kam allilla iachaita mas iachaikukugta. ¹⁶ Kam kikin iuiaringi, alli iuiawai kangapa. Kam kikin iachachikuskatapas kawangi, allillachu ka. Tukuipi mana sakispalla kangi. Chasa ruragpika, kam kikin kispirinkangimi. Kamta uiagkunapasmi kispiringakuna.

5

Imasa sugkunawa kaugsai iukaskamanda

¹ Achala runakunata mana sinchi rimangi. Kamba taitatasinami iukangi suma iuiachinga. Musukunatapas chasallata waugkinditasina suma iuiachingi. ² Achala warmikunataka mamatasina suma iuiachingi. Sipaskunataka, mana jiru iuiaspalla, paninditasina suma iuiachingi.

³ Mana iukag sapalla kidaska warmikunataka ima ministiskakunata aidangi. ⁴ Maikan biudapas wambrakuna i wambrakunapa wambrakuna iukagpika, chi wambrakunata ñugpa iachachingi, pai kikinpura suma llakirispa, imakunapipas mamaata i taitata: “Pai Mamita, Pai Siñur” nispa aidanakuchu. Chasa ruragkunami Taita Diusta suma

kuntintachinkuna. ⁵ Ikuti sapalla kidaska warmika iukanmi, tuta punchapas Taita Diusta iuiaispalla mañaspa, paita iuiaspalla kanga. ⁶ Maikan biudapas kikinmandalla alli iuiachirispa kaugsagka, wañuskasinami niraiá.

⁷ Nuka ima nikuskata rurangapaka, allilla iachachingi. Chasawaka uiaspa rurakunata, ñi pipas mana piñai pudingakunatachu. ⁸ Ikuti maikanpas paipurakunamanda i maspas kikinpa wasipi kaugsanakuskamanda kuidangapa kungarigka, chi Alli Willaita uiaskata piñarigmi niraiá. Taita Diusta mana uiagkunamanda mas pandarigmi niraiá.

⁹ Sapalla kidaska warmikunata aidangapa willaraiaska librupika churangi sugta chunga iali wataiug i suglla kusa iukaskakunallata. ¹⁰ Iukangimi, paikuna allilla ruraspa kagkunata kasa rigsinga: wambrakunata alli wiñachispachu ka; paipa wasima chaiagriskakunata sumagllachu chaskí; Taita Diuspalla kagkunata chakikunata maillaspachu ka; ima llakii iukaskakunatapas sumagllachu aidangapa kawá; nisunchi: tukui imapipas allilla ruraspa kagta, chasakunata chi librupi churangi aidangapakunata.

¹¹ Ikuti mas sipas biudakunapa sutikunataka mana chi librupi churangi. Pudinkunami, paikunapa iuiaska munaita mana sakingapa pudispas, Cristota wasa churagsina ruraspaka, ikuti kasarangapa munanakunga. ¹² Chasa ruraspaka, paikuna mana imasa Cristota niskasina ruragmandami pandarig tukugsamunkuna. ¹³ Kasa-

pasmi tukugsamunkuna: killa wangu tukuspa, wasi wasillami puringapa munankuna. Mana killa wangulla tukunkunachu. Chankualkuna tukuspa, tukuipi rimarispami purinkuna. Imasa mana chaiaska parlukuna wasa rimaikuna rimaspallami purinkuna. ¹⁴ Chimandami munantrani: sipas biudakunaka ikuti kasarantrakuna, wawita iukachukuna; allilla wiñachichukuna; kikinpa wasipi tukui allilla ruraspa kaugsachukuna. Chasaka, iaia kukuka mana pudingachu, ñi ima juchachinga. ¹⁵ Maikan biudakuna, ñami Cristowa iuiriskata sakispera, iaia kukuta katichinakú.

¹⁶ Kasapas. Maikan [warmi] Cristowa iuiarig, sug biuda paipura iukagpika, chi biudata sumaglla kawaspa, ima ministiskakunata aidachukuna. Chasaka, tukui Cristowa tukuskakunata mana chaiangachu paita kawangapa. Chiwanka, pakuna pudingakunami, sapalla warmi kidaskakunata aidangapa.

¹⁷ Cristowa tukuskapura iacha taitakunata iukangimi, iskai biaji “Pai Siñur” nispa munanga. Diuspa Rimaита willaspa iachachispalla kagkunataka masmi chaiaku kulki karanga. ¹⁸ Chasallatami ñugpamanda librupi willaraiá, kasa nispa:

Triguta saruspa iskug wagrata
mana simita watangi.

Chasallatami niraiá:
Maikan trabajagkunatapas chaianmi,
trabajaskamanda paganga.

¹⁹ Cristowa tukuskapura iacha taitakunamanda pipas ninakuchu: “Mana allilla ruranchu”: iskai u kimsa kawaskakuna mana chasallata

willagpikunaka, kam mana ñi imapas uiakungi. ²⁰ Maikanpas ikuti ikuti pandarigtaka tukuikunapa ñawipi iuiachispa piñangi. Chasa kawaspaka, sugkunaka, mancharispa, mana chasa pandariikunata rurangakunachu. ²¹ Taita Diuspa, Jesucristopa i agllaska anjilkunapa ñawipimi kai niraiaskata mingaiki: nuka ima kamta niska iuiachiskakunata rurangi, ñi pitapas mana agllaskasina iuiaspalla. ²² Manara allilla rigsispas kawaspalla, kamba maki mana pitapas churakungi, Cristowa tukuskapura iacha taita kangapa. Mana kagpika, paikuna mana allilla ruragpikuna, kam pandarikugsinami tukunga. Imakunapipas sumaglla iuiaipi kangi.

²³ Kam ikuti ikuti wigsa nanai ungug kaspa, kunauramanda niikimi: mana iakulla upiangi. Aslla aslla binutami iukangi upiangi.

²⁴ Sugkuna pandariskamanda ñami iacharí, manara kabilguna chaiagrigpita. Ikuti sugkuna pandariskakunamanda mas nispami iacharí. ²⁵ Chasallata, ima allilla ruraskakunamanda ñami iacharí. Ikuti manara iachariskaka, mana pakalla kidanchu. Imaurapasi iacharí.

6

¹ Maikan lutrinpas, kikinpa patrunta tukuipi suma iuiaiwa uiachukuna. Chasaka, Taita Dius i paimanda ima iachachiskakuna mana kamirispalla kachukuna. ² Cristowa iuiarig patrun iukagkunaka mana nichukuna: “Nukapa patrun, nukawa waugkindisinami ña kanchi. Chiwanka, paita mana uiasa”. Chasapaka iuiarichukuna, chi

patrunkuna Cristowa iuiarig kuiaska waugkindisina kagtakuna. Chasa iuiarispaka, mas allilla rurachukuna. Chi niskakunatami iukangi, sinchi iuiachispa iachachinga.

Taita Diuswa suma iuiarispaka, iapa iukagsinami kanchi

³ Maikanpas, Iaia Jesucristopa alli suma rimai-kunawa i Taita Diuswa iuiaringapa iachachis-kakunawa iuiaringataka, sug rigcha iachachig-kunaka, ⁴ atun tukuspa, “Iachami kani” iuiarispa, ñi imapi allilla iuiaita mana iukankunachu. Chi runakunaka, ima rimaipipas maskarinkunami, sugkunawa ainichirinakuspa ningapa: “Kam rimaskaka, mana allilla kanchu”. Chimaniami kasa mana allilla tukugsamú: sugkunata jiru iuiaiwa kawangapa; piñachirinakungapa; kaminakungapa; mana allilla sugkunamanda iuiianakungapa; ⁵ sutipa kaskata sakispá, jiru iuiagpura piñachirinakungapa, mana tukurinkama. Chasakuna iuiankunami, Taita Diuswa iuiarispaka, iapa kulki iukag tukugsamungapa kagtakuna. Paikunapagmandaka anchuringi. ⁶ Taita Diuswa suma iuiarispaka, mana ñi ima iukaspapas, iapa iukagsinami kanchi. Chasaka, Taita Dius ima karaskallawa allillami kaugsasunchi. ⁷ Nukanchi tiagsamuura, ñi imawa mana chaiagsamurkanchichu. Chassallata, wañuura, ñi imapas mana apaspa ringapa kanchichu. ⁸ Mikungapa i katanga churaringapa tiachu: chikunallawami iukanchi kuntintarispa kanga. ⁹ Ikuti iapa iukangapa iuariispa munagkunaka, manami pudingapa kan-

kuna, chasa iuiaikunata sakingapa. Tugllapisina urmaspa, wagllichirinkunami. Iapa upasina, tukui iukangapami munagsamunkuna. Chasa iuiaillawa kaskakuna, diltudupami wagllirispa puchukarinkuna. ¹⁰ Kulkita iapa kuiaspa munag, tukui mana allillapi urmachigmi ka. Sugkunaka, kulkillawa iapa iuiaspa, Cristowa iuiariskata sakispaa, sug mana alli ñambitami rigsina rurankuna. Chasaka, iapa llakii iukaspallami kaugsankuna.

Timoteo ima rurai iukaskamanda

¹¹ Kamka, Taita Diuspa runa kaspa, tukui chi jiru iuiaikunamanda anchurispa kaugsangi. Taita Dius ima munaskata ruraspa, paita suma iuiarispa, Cristowa tukui iuiariskata mana sakispalla kaugsakungi. Chasallata, tukuikunata kuiaspa, mana piñanakuspalla, mana atuniachirispalla iuiaipi kangi. ¹² Cristomandalla iuiarispa tukupi binsispa kangi. Mana puchukaridiru suma kaugsaita, jujalallapas kichui tukungi! Chi kaugsaita iukangapami Taita Dius kamta kaiarka. Chasmadami, achkakunapa ñugpa ladu, kam Cristowa tukuskata allilla willarkangi.

¹³ Taita Dius tukuita kaugsai karagpa ñawipi i Jesucristopa ñawipi kasami niiki. (Kikin Jesucristopas, Ponsio Pilatospa ñawipi kikinmanda tapuchiura, allillami willarka.) ¹⁴ Nuka ima niskata allilla ruraspa kaugsangi, mana pandarispalla. Chasa kaugsagpika, kamta mana chaiangachu, ñi imapipas piñai tukungapa. Chasa ruraspa kaugsangi, nukanchipa Iaia Jesucristo ikuti samunkama.

¹⁵ Taita Dius kikin munaska punchami Jesucristota ikuti kachamunga. Pai Taita Diusmi ka

suglla, tukuipi iapa suma pudig. Atun mandag-kunamanda i iaia mandagkunamandapas mas iaiami ka. ¹⁶ Paillami ñi imaurapas mana wañungapa ka. Mana pipas chaiangasina punchapimi kaugsá. Paita, ñi maikan runa mana kawaska kanchu. Pai, ñi ima mana kawarigmi ka. Tukikuna imaurapas paita kuiaspa nisunchi: “Kam, diltudupa tukuikunamanda mas atun mandagmi kangi”. Chasa kachu.

Iapa iukagkunata iuiachiskamanda

¹⁷ Kai alpapi iapa iukag runakunata nipuai, mana iapa atuniachiriska iuianakuchu; kaipi tukurig iukaskakunallawa mana iuiarinakuchu; kaugsag Taita Diusllata iuiarispa kaugsanakuchu. Taita Diusmi tukui puchugta kará; chikunawaka, nukanchi allilla kaugsangapa. ¹⁸ Chi iapa iukag-kuna, tukuipi allilla rurachukuna. Chi ruraskakunawami, Taita Diuspa ñawipi iapa iukagsina niraiangakuna. Mana michaspalla, ima iukas-kata karaspa kachukuna. ¹⁹ Chasa ruragkunaka, saiacchingapa wasi muruchu rumikuna kagsina-mi suma luarpi iukangakuna. Chiwanka, sutipa mana puchukaridiru suma kaugsaitami taringakuna.

Kaiakama, niskamanda

²⁰ Timoteo, kamta mingaskata allilla kawangi. Kai alpamandalla ianga parlukunata mana uiangi. Chasallata, llullaspa alli iachai kagta sug rigcha sug rigcha iachachiskakunata mana tuparingi. ²¹ Sugkunaka, chi iachachiskakunata katispa, Cristowa iuiariskata sakispa, sug mana alli ñambitami rigsina rurankuna.

Taita Dius, kamwa kagkunata sumaglla kawa-puachu.

Kaipimi Taita Dius Rimaku New Testament in Inga

copyright © 2009 Wycliffe Bible Translators, Inc.

Language: Inga

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Inga

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files
dated 29 Jan 2022
[7cb53c42-7354-5f68-b71b-5115a92bd97a](#)